

吳中舊事

郡人陸輔之友仁纂



吳中山水清嘉衣冠所聚今其子孫往之淪
落無聞其遺風餘俗邈不可致故因暇日叅
記舊聞凡一伯餘事庶資郡乘之萬一云爾
李育字仲蒙吳人馮當世榜第四人登第能為
詩性高簡故官不甚顯而少知之者與外大父
晁公善尤愛其詩先君嘗得其親書飛騎橋一

篇于晁公字畫清麗以為珍玩詩云魏人野戰
如鷹揚吳人水戰如龍驤氣吞魏王惟吳王建
旗敢到新城旁霸主心當萬夫敵麾下蒼皇無
羽戩途窮事變接短兵生歿之間不容息馬奔
津橋之半撤洶之有殺如地裂蛟怒橫飛秋水
空鶚驚徑渡秋雲闕奮迅金羈汗沾臆濟主艱
難天借力艱難始是扶主時平日主君須愛惜
蔣侍郎堂藏楊文公與王魏公一帖用半幅紙

有折痕記其略云昨夜有進士蔣堂携所作文
來極可喜不敢不布聞謹封拜呈後有蘇子瞻
跋云夜得一士旦而告人察其情若喜而不寐
者蔣不知何從得之在其孫彛處
程光祿師孟吳下人樂易純質喜為詩效白樂
天而尤簡直至老不改吳語與王荆公有塲屋
之舊荆公頗喜之晚相遇猶如布衣時自江州
致仕歸適荆公蔣山留數日時已年七十餘荆

公戲之曰公尚欲仕乎曰猶可更作一郡荆公
大笑知其無隱情也

蘇子美云吳中渚茶野醞足以消憂葍鱸稻蟹
足以適口又多高僧隱君子佛廟勝絕家有園
林珍花奇石曲池高臺魚鳥流連不覺日暮遂
終此不去焉

林德祖處云余家自伯父皇考洎諸父奉王大
母來居蘇著籍此州者五十年矣今帶城槁儒

學坊為吾家舊榜也橫山之寶華山之博士
塲吾家三世之所葬也華山有智顛寺宋紹聖

四年知樞密院事林希請為功德寺遂加慈嚴
之額林氏坟在寺後朱諸珣字永叔隱君子也鄉人罕識之章丞相程
光祿尤與之厚善

穹窿寺有米元章題草書壁高宗嘗欲取去有
狀免不曾移徙

林樞密家在寶華山下故書手澤多為入所得
余家藏其手書左傳訓練二帙末有題字云姑
蘓林子中借錄于家藏

辛卯仲秋中澣大水霖雨不止
紹興中有于古塚得故外黃令高君碑隸書殘
闕乃東漢高彪漢書傳云彪吳郡無錫人為內
黃令帝勅同僚臨送祖于上東門彪到官有德
政上書薦縣人申屠蟠等卒于官吏以外黃為

內黃誤矣當以墓碑為正隸釋云紹興中吳郡
取土于郭外而得之今碑在郡齋

章伯深淵言吳中風俗上元夜鏡歌鼓吹喧街
市謂之旱划船

龍溪曾彥和敗會稽賀方回鑄二家書最多其
子猷之朝各命以官皆經彥和方回手校二家
並居郡中今西山羊腸嶺有彥和之父墓碑
范文正公長子監簿純佑自幼警悟敏明過人

所料事必先知之善能出神公在西邊凡虜情
机事皆預遙知蓋出神至虜庭得之故公每制
勝料敵如神者監簿之力也一日日出神為人
所驚自此神觀不足未几而亡時甚少也張子
賢聞之公之族子閻彥和云

平江自朱勳用事花木之奇異者盡移供禁御
下至墟墓間珍木亦遭發鑿山林所餘唯合抱
成圍或擁腫樸散者乃保天年建炎己酉冬庚
戌春宣撫使周望留姑蘓諸將之兵斧斤日往
樵斫俱盡棟梁之材析而為薪莫敢誰何諸山
皆童矣亦草木一時之厄耶

宣和間朱勳應奉進為鄴度使子汝賢慶陽軍
承宣使汝功靜江軍承宣使汝文閣門宣贊舍
人弟勳閣門宣贊舍人汝斌朝奉大夫直龍圖閣汝
舟明州觀察使汝明榮州刺史孫締繹約絢締
綬並閣門宣贊舍人綽紳並閣門祇候一時軒

裳之盛未之有也靖康初籍其家悉追奪竄嶺表
宣和癸巳春勛採太湖龜山得一石長四丈有
竒廣得其半玲瓏嵌空竅穴千伯非雕刻所能
成也并郡宅後池光亭臺上有白公檜世傳白
樂天手植也創造二大舟費八千緡以獻時常
潤間河渠淺淤重载不前乃先繪圖以聞宸翰
賜名神運昭功敷慶萬年之峯是秋方至京師
詔置于良嶽石

建炎庚戌二月二十五日虜兵陷平江府兩浙宣
撫使周望移兵退保崑山縣泊舟馬鞍山下湖邊
吏方用印忽有風旋轉入舟印與文移俱捲入水
相視駭愕使水工探之不獲望懼北兵之來襲
也欲急走屯通惠鎮為失印所撓留吏求之吏
禱于馬鞍山神曰靜濟侯者曰苟不獲將得罪
必焚庙而行縣令亦惧乃作堰捍水以躡車涸
之畚鍤如雲鑿數尺始得之已淪于泥中矣

新唐書載張籍和州烏江人而張洎作張司業
詩序云籍蘇州吳郡人二者無可考證今烏江
縣有張司業宅則疑傳載為是予因以詩集考之
有贈陸暢詩云共躡長安街裡塵吳門獨作未
歸身胥門舊業今誰在君過西塘為問人由是
可知其為吳人無疑矣抑亦嘗寓居烏江也考
韓文公文亦曰吳郡張籍

府署之南名吳會坊按後漢蔡邕傳亡命江海
遠跡吳會註引會稽高遷亭內竹椽為笛事又
諸葛孔明說荊州形勢曰東連吳會王羲之為
會稽內史時朝廷賦役煩重吳會尤甚石崇論
伐吳之功曰吳會僭逞指言孫氏則吳會當是
吳郡與會稽猶言吳越也蓋不特謂姑蘓今坊
名吳會未知何據而然前漢吳王濞傳上患吳
會輕悍即吳會也

吳人多謂人為歎子唐韻云小歎大癡不解事者

慶曆間安定胡先生在吳學蘇子美被誣還居
滄浪亭太常博士陳虞卿壯歲致仕而歸吳中
稱三賢人胡先生以教子美以文虞卿以行名
重天下
程若筠吳中道士善畫嘗召至京師
秀峰寺西二十里至三洋有福林寺門石幢
刻唐咸通年又云上當慶忌尼寺蓋寺舊名云
字已漫滅

吳農忌五月甲申乙酉雨，則大水諺云甲申
猶自可乙酉怕殺我

范至能有會散夜步詩云忘却下樓扶我誰接
羅顛倒酒沾衣貪看雪撲滿堦月上籃輿步
砌歸步砌吳語也

雕簷綺戶倚晴空如畫曾是吳王舊臺榭自浣
紗人去後落日平蕪竹雲斷幾見花開花謝淒涼
闌干外一簇江山多少圖王共爭霸莫問愁金

杯瀲灩對酒當歌歡娛地夢中興亡休話漸倚
遍西風晚潮生明月裏鷺鷥背人飛下余每登
姑蘇臺讀潘庭堅柱間洞仙歌輒徘徊不忍去
元統三年冬郡守濟南張侯新修此臺易去舊
柱遂不復存庭堅淳祐中嘗為浙西茶鹽司幕
幹官

鄧道樞字庭叔綿州人端平甲午隨魏文靖公
下瞿塘峽越五年抵吳

僧妙應者俗姓童鄉人呼為童和尚妙于刻石
居隆興寺嘗摹廬山王瀚須菩提像刻寺中其
碑陰作天台五伯尊者筆法奇古又于虎丘作
石觀音像亦佳淳熙中人
五柳堂者胡公稷所作也其宅乃陸魯望故址
所謂臨頓里是也

楊懿儒字彛父其先浦城人與方子通同時號
吳中二老子友夔字彛韶有文行許彥周云彛

韶長僕十餘歲向同在姑蘇時盜發孫堅墓楊
作詩云闔閭城南荒古丘昔誰葬者孫豫州久
無行客為下馬時有牧童來放牛嗚呼舜韶今
止矣他詩皆工必可傳世也
孫寔字若虛郡人少負俊声雅好滑稽談笑有
味壯游鄉校同舍皆出田里家富以孫之貧不甚
加禮而一牛姓者尤所侮玩因作牛秀才賦嘲之
中有云腰帶垂頭尚有田單之火幘頭脚上猶葦

甯戚之謠賦成聞者絕倒是時樂圃先生朱長
文為州學教授命其父訓飭之遂發憤至京入
太學登第而歸仕至朝奉大夫知光州卒

丁晉公自光州歸葬華山所居在大郎橋堂字甚
古有層閣數間臨其後諸孫德隅善篆亦工四六
鄭宣徽戩字天休居臯橋墓橫山
林槩字叔平本長樂人徙居吳有子六人曰希
字子中旦字次中劭字才中穎字傳中相繼登

科其二早卒希知樞密院事謚文節旦為殿中
侍御史劭為顯謨閣學士謚正肅穎為光祿卿
希之子虞中詞科旦之子處亦登第有文行劭
之子慮賜出身為中書侍郎近世儒門之盛必
推林氏云

王仲言聞之陳齊之云林叔平神宗朝老儒
也子希旦劭穎擅克家之業叔平歿時有二
子尚在襁褓未名既長而兄乃析其名示不

忘父訓也曰希曰旦曰劭曰穎後皆為聞人
號衣冠名族

葉少蘊云今言平江府為吳下灌嬰傳云渡江
破吳郡長吳下吳郡蓋平江也下槩言之猶稷
言稷下敖倉言敖下云耳
潘勺字叔治登第為吳興都掾絕意祿仕遍游
天下佳山水有雁蕩百詠自號癸甲先生或問
其故曰終始之義也後果以癸日卒甲日殮

葉少蘊又云吾鄉有老儒方惟深者字子通能
詩嘗為王荆公所知用意精苦所居陋巷終日
閉門遇有詩思即又閉其室步行其中引韻瞋
目如與人語或空中搏拏跳躍故里人戲之為
方捉鬼子通嘗徑造一園亭不遇主人自盤礴
終日因題詩壁間云何年突兀庭前石昔日何
人種松栢乘興間來就榻眠一枕清風君莫惜
城西今古陽山色城中誰有千年宅來去何須

問主人主人自是亭中客其洒落如此釋仲殊
一日訪子通留詩云多年不見玉川翁今日相
逢小樹東依舊青筠無長物只餘松檜養秋風
可見其清簡矣

陳長方字齊之其先長樂人父侁字復之取林
大卿旦之女大雲翁處之妹與陳堂中交甚密
堂中謫廉州侁以書賀之至千餘言由此得罪
又嘗從游定夫深得治氣養心行已接物之要

故其子亦為道學之士齊之因外家居于步里
終日閉戶研究經史號唯室先生有步里客談
漢唐論行于世其弟少方字同之亦端慧不群
號二陳云
章氏本建安人邵公之裔後徙居于吳者有二
族子厚丞相家州南質夫樞密家州北兩地屹
然輪奐相望為一州之甲吳人號南北章以別
之

吳郡城北五六里有一大塚在官塘之西相傳
為唐相陸宣公墓故其地名陸墓水名陸塘淳
熙間有于墓旁得遺刻與所傳合郡人周虎張
震發皆紀其事或謂公雖郡人生于嘉興自貶
忠州別駕薨于忠州其喪不曾還吳嘉興寶華
寺乃公故宅按忠州圖經陸宣公墓在至虛觀
南三十步豈嘗藁葬于此又謂公已歸葬而忠
州特設虛塚耳

郡治之東有和令坊今名槐樹巷或以為楊和王存中所居而然非也按圖經在唐季已有此名紹興初楊始籍為園垂三十年楊方進封和國雖事偶合亦先兆也

史發運宅在帶城橋淳熙初宅成計其費一百五十萬緡僅一傳不能保僦直十萬緡久不就售後為丁季卿一萬五千緡得之紹定末丁又不能保趙汝樵來為浙西提刑官占為百萬倉

和糴場故老說發運初歸舳舻相銜凡舟自葑門直接至其家用發運司案紙黏窓煮黏麩六七石自後僅易目前耳萬卷堂環列書四十二厨寫本居多始則論斤賣為故紙其後勢家每厨止得十千席卷而去

范雎字伯達在太學嘗試禹稷顏回同道論學官見之以為奇作置之魁選遂馳譽京師學者至今為模範入館除秘書郎成象成大即其子

也紀聞亦載

郭氏本郡中一小民所謂林酒仙者每至其家必解衣以醉之酒仙遷化前數日語郭氏曰疇昔荷相接之勤以藥一杯為報郭氏以味惡頗難之力強之飲至三呷而止酒仙自舉而盡遂授以朱砂圓方曰惜乎富及三世耳郭氏竟售其藥四方爭求買之自此家大富及三世後絕無有售之者紀聞亦載

張震發字元龍郡人嘉定七年袁省榜進士廷

傑漢卿曾孫也

孫仲益守郡日戶口已四十三萬

徐稚山侍郎有妹能詩大不類婦人女子所為

其詩冲澹蕭然出俗自成一家紀聞亦載

姚齊字子齊郡人淳熙二年進士

張字季安

陳少皋字舜卿

朱冲微時常以賣藥為業後家稍溫易為菜肆
生理日益進以行不檢而受徒刑既擁貲交結
權貴然亦能以濟人為心每遇春夏之交即出
錢米藥物募醫官數人巡門問貧者之疾從而
周之又多買弊衣擇市嫗之善縫紉者製衲衣
數百當大寒雪盡以給凍者其子勛因賂中貴
人以花石得幸時時進奉不絕謂之花石綱凡
園林亭館以至坟墓間所有一花一木之奇怪

者悉用黃紙封識不問其家徑取之浙人畏之
如虎花石綱經從之地巡尉護送遇橋梁則撤
以過舟雖以數千緡為之者亦毀之不恤初江
淮發運司于真揚楚泗有轉搬倉綱運兵各據
地分不相交越勛既進花石遂撥新裝運舡充
御前綱以載之而以舊者載糧運直達京師而
轉搬倉遂廢糧運由此不繼禁衛至于乏食朝
廷亦不之問也勛之寵日盛父子俱建節鉞即

居第創雙節堂又畫徽宗御容置之一殿宇監
司運守必就此朝朔望勛嘗御宴徽宗親握其
臂與語勛遂以黃帛纏之與人揖不舉此臂弟
侄數人皆結姻帝族黃緣得至顯官者甚衆勛
有園極廣植牡丹數千本花時以繒綺為幕罩
覆其上每花飾金為牌標其名里凡園夫畦子
執精種植及能疊石為山者朝釋負擔而暮紆
金紫如是者不可數計園中有水閣作九曲路

以入春時縱婦女遊賞有迷其道者設酒食邀
之或遺以簪珥之屬人皆惡其醜行一日勛敗
檢括其家貲有黃發勺者素與勛不協既被旨
黎明造其室家人婦女盡驅之出雖里巷小民
之家無敢容納不數日已墟其園所謂牡丹者
皆折以為薪每一花牌估值三錢勛誅又竄其
家于海島前日之受誥身者盡褫之當時有謔
詞云、初勛葬其父盛飾一女奴一僮以殉之

奴僮不知其死也欣然從柩而入壙靖康末
大飢郡人怨毒入骨劫其壙而碎其骨初入壙
門見白骨工具猶志之曰此奴僮也紀聞亦載
秦檜妻之弟王暎字顯道紹興初知府事峻于
聚斂酷于用刑然其規為亦有可取者兵火之
餘故墟瓦礫山積乃錄入小城出必載瓦礫以
培塘人以為便石之破碎者積而焚之以泥官
舍不賦于民而用有餘覺報寺其私家祠也黃

堂前鑄錢置大士像人不敢言每刺鹿血置熟
酒中飲之以求補益未几疽發背死
葉少蘊言吳人俚語若等人易得以暎人易得
醜雖鄙亦甚有理

徐敦立言往歲吳中多詩僧其名往見于前
輩文集中予渡江之初猶見有規者頗以詩知
名其為人性坦率其徒謂之規方外時年七十
餘矣談論蕭散可喜臨終前數日有詩曰讀書

已覺眉稜重就枕方欣骨節和睡起未知天早
晚西窗殘日已無多葉左丞大愛之
潘允字悅之吳人仕徽宗為侍從宣和初奉祠
居里中時郡人朱勛以倖進寵眷無比父冲殂
勛護喪歸葬鄉閭傾城出送而潘獨不往潘之
先塋有山林形勢近冲新阡勛欲得之乃修敬
于潘杜門不納勛特是自恣遣人諷之且藉
以熏天之勢潘一切拒之勛歸京師果懇于上

御筆奪之已而又誅御史誣之以罪而褫潘之
職雖抑之于一時而吳人至今稱之
龔敦頤字養正和州人兵部侍郎原之曾孫居
于郡中有史學念元祐諸臣及建中靖國上書
等人多表立名節徑崇寧禁錮靖康流離子
孫不能盡存平生施為漫不可考慨然屬意求
訪遺闕遂成列傳譜述一百卷凡名在兩籍者
三百九人而書于編者三百五十人其不可考

者四人而已淳熙七年周益公必大修國史荐
之得旨給筆札繕寫以進後七年洪景盧以翰
林學士領史事復荐之得上州文學
郊僑字喬年元豐中人有幼學警悟
章字季思其先州人從蒲城後因高祖
葬吳遂為郡人祖父皆隱約不仕季思嘗問學
于朱文公隱居白屋出入徒步人稱之曰聘君
貴之也平生足跡不越州境而四方之人無不

知有章季思士大夫遇吳以不見為嫌其為人
向慕如此作詩至多遇紙即書之成人之取去
以此樂終身不厭年七十八以疾終于家將卒
時其正寢梁木折壞有聲人皆異之郡人胡淳
從季思學歲時致醪醴薪米其卒也又代二子
書世出內壙中淳字以初
姑蘇李璋敏于戲調偶赴隣人小集主人者雖
富而素鄙會次適坐李旁既進食璋視主人之

前鮭魚特大于衆客璋謂主人曰璋與主人俱
蘇人也每見人書蘇字不同其魚不知合在左
邊是在右邊是主人曰古人作字不拘一體移
易從便也璋即引手取主人之魚示衆曰領主
人指揮今日左邊之魚亦合從便旌移過右邊
如何一座皆笑有一故相遠派在姑蘇嘗題游
處壁云大丞相再從侄某人至璋題其旁曰混
元皇帝三十七代孫李璋繼至

後一事見
紀聞錄

吳俗好花與洛中不異其地亦宜花古稱長洲
茂苑以苑目之蓋有由矣吳中花木不可殫述
而獨牡丹為藥為好尚之最而牡丹尤猶貴重焉
舊寓居諸王皆種花往往零替花亦如之盛者
藍叔成提刑家最好事有花三千株弭萬花堂
嘗移得洛中名品數種如玉盃白景雲紅瑞雲
紅勝雲紅間金紅之類多以遊宦不能愛護輒
死今惟勝雲紅在其次林得之知府家有花千

株胡長文給事成居仁太尉吳謙之待制家種
花亦不下林氏史志道發運家亦有五百株如
畢推官希文常承務俊心之屬多則數百株少
亦不下一二百株習以成風矣至穀雨為花開
之候置酒招賓就壇多以小青蓋或青幔覆之
以障風日父老猶能言者不問親疎謂之看花
局今之風俗雖不如舊然大概賞花則為賓客
之集矣

方臘之起郡中令保甲巡邏雖士流亦不免范
無外率府學諸生冠帶夜行用大燈籠書一絕
句于其上云自古輕儒孰若秦山河社稷付他
人如今重士如周室忍使書生作夜巡太守聞
之亟為罷去盛章作守頗慢士范曰元夕府會
作寶鼎覲詞投之極蒙嘉獎遺以酒五百尊其
詞至今傳播紀聞亦載
袁鰲可以崑山人紹興十二年進士有文齋襟

記子宗仁中世科
甫里白蓮花寺乃陸魯望故宅後有祠堂像貌
蓋唐時物咸熙間有盛氏子醉遊寺中因仆其
像于水中則滿腹皆其平生詩文親稿也寺僧
訟于郡守倪普深怒之遂從徒坐而更塑其
像雖足少雪天隨之辱而無復當時之腹藁矣
黃子由尚書夫人胡元功尚書之女也俊雅強
記經史諸書略能成誦善筆札作詩文亦可觀

于琴奕寫竹等紈尤精自號蕙齋居士時人比
之李易安云

范文穆公成大晚歲卜築于郡之盤門外十里
蓋因闔閭所築越來溪之故基隨地勢高下而
為亭榭所植多名花而梅尤盛別築農圃堂對
楞伽山臨石湖所謂姑蘓前後臺相距亦止半
里耳孝宗嘗御書石湖二大字以賜之公作上
梁文所謂吳波萬頃偶維風雨之舟越成千年

因築湖山之觀者是也又有北山堂千巖觀天
鏡閣壽櫟堂他亭宇尚多一時勝士賦詠無不
鋪張之美乾道壬辰三月上巳周益公必大以
春官去國過吳公招飲園中夜分題名壁間云
吳臺越壘距門才十里而陸沉于荒烟野艸者
千七百年紫微舍人始剏別墅登臨甲于東南
豈鷓夷子成功于此扁舟去之天闕絕景須苗
裔之賢者然後享其樂耶公為之擊節而前後

所題盡廢焉

黃端冕家有白鹿巖梅溪鹿苑臺銘記云維定
武六年八月日銘記大晉永和七年歲在辛亥
三月十九日平原內史陸機再建立華陽真逸
書字畫蓋王逸少書端冕以為視此刻則瘞鶴
銘為右軍書無疑矣

下連

端冕名纓其先建安人吳光福寺中滌滌直秘
閣端冕宣和末屢上書言事時李丞相綱為行

營使嘗居幕府遭亂還鄉紹興初有文名其後
有名簡字元易者博學強記善談吐能為詩文
樂府所著有東浦集雲墅談雋弟司理緯字師
文善醫有奇才喻子才其妹之夫也
晁補之云近見蘇子美墨跡一卷皆自書其所
作詩行草爛然龍蛇飛動其中有獨酌詩云一
酌澆腸俗慮奔鷄微鵬大豈堪論焚靈當日能
知此肯入滄江作旅魂卷尾題云慶曆乙酉書

于姑蘓駟舍考其詩蓋是被罪之明年居滄浪
時所書其詩放曠如此或謂流落幽憂以終非
也

清源莊季裕云建炎三年寓長洲縣彭華鄉高
景山北白馬澗張氏舍時山中設烽火日舉以
報平安留月餘即過浙東臨行書一絕于壁間
云昔年領牒佐邊侯愁望長安向戍樓今日衰
顏來澤國又看烽火照長洲是冬金人犯杭越

明年春正月由平江以歸白馬澗去城十八里
有宅百餘區盡被焚毀獨留予所居于壁邊題
耿先生到此不燒七字
畢良史字少董一字伯瑞東平人丞相文簡公
五世孫風度凝遠少遊京師四舉禮部不中出
入貴人之門遭亂南渡僑寓興國軍江西漕蔣
粲喜其鑒辨博洽資給令赴行在遂以博古說
諸內侍內侍皆喜之上方搜古器書畫之屬恨

未有能辨其真偽者得良史甚悅月給餐錢五
十千仍令內侍延請于門客又得束修百餘千
而食客滿門隨有輒盡用族人晁澤補上州文
學紹興中為東京留守屬官權知東明縣東京
再陷即罷從事留虜中二年著春秋正辭論語
探古有宋城哲夫李師微願執經師之宋執一
卷書背立且讀且止李執一卷書向其師若有
問者而良史坐一榻上後有二女奴各有所執

而阿冬者坐其間良史之季女也女奴之墜者
曰孫壽冠者曰馬惠真好事者寫為傳經圖陷
北境時嘗褐衣走間道即以蠟書上之泗上繼
好勅蕭誼以歸、日進所著書改秩陞朝後以
直敷文閣知盱眙軍以卒子希文希旦至今子
孫多居吳中云

潘夢旂字天錫郡人慶元二年鄒應龍榜進士
及第所著有漢兵編夷堅三忠事

程泳之沂伊川先生之孫知崑山縣秩滿其弟
鉅為府監倉乃携其家就居焉

王陵字希武叅知政事絢之子有第宅在崑山
紹興三年癸丑八月五日長洲縣地震自西北
來樹木皆搖蕩父老云元祐九年九月二十一
日嘗如此又紹興十三年癸亥三月十五日清
明大雪盈尺
郡人潘擇可崇寧五年以上舍法貢入京未至

夜夢衣褐挽車三十兩其弟端夫衣綠隨其後
政和三年擇可以上舍釋褐後三十年端夫始
就恩科乃悟挽車三十者三十載也
孫价字元善居郡中其子紹遠字稽仲提舉福
建常平 紹祖字文仲俱有文學政事
錢侯字維大郡人趙遠榜進士及第嘗任著作
郎將作少監

李益字彥中郡人嘉王榜上舍出身

魏志字幾道郡人紹興四年進士

盧彥仁龍圖直閣學士秉之孫

姑蘓雍熙寺每月夜向半嘗有嬾人往來廊廡
間歌小詞且哭且歎聞者就之輒不見其詞云
滿目江山憶舊遊汀洲花草弄春柔長亭艤住
木蘭舟好夢易隨流水去芳心空逐曉雲愁行
人莫上望京樓好事者錄歲之士子慕容叢鄉
見之驚曰此予亡妻所作外人無知者君何從

得之客告之故巖卿悲曰此寺蓋其旅櫬所在也
魏鑄紹興間人善草書學虞世南孔廟記太和
宮碑是其跡
麋師旦字周卿吳人紹興戊辰登科紹熙庚戌
為江東轉運主管官蜀相士楊生謂予相法當
有肉峯生頂上愈壯則愈顯後果有肉隆然癸
丑歲為嘉禾守楊復訪之則峯益高麋嘗歷御

史主簿秘書郎春秋凡七十矣然終至左司郎
中卒于乙卯

吳仁傑字斗南其先洛陽人居吳中父信舉進
士至國子學錄弟輔仁字子樗

陸知微吳人靖康中為開封府尉氏丞

即陸燾

林璞字伯振弟琰字玉珪乾道五年同登進士

琰善篆文

王曉字浚明

何蓑衣馱道僧二事見夷堅辛志

淳熙己未歲夏秋之交天久不雨所在苦旱吳
郡醮祭踰月不効通判趙師禹憂見于色適有
寓客林通判光祖自少奉道法得于路真官者
有起龍致雨符其應如嚮趙具詞瀝懇于林
為飛牘奏三境上言檄告水府令其子永壽偕
趙客陳擇齋往林屋洞投之洞蓋太湖龍窟土
民云欲雨時則洞口出雲如饋餉兩人涉巨浸

抵雲祐觀集道流具香几詣洞焚檄竟褰衣以
入其前嘉木一本童若幢云

郡城北數里有古石幢唐徐浩書太守陳師錫
徙置府第鄉人夜過河上者多見鬼物乃相與
請于州復置舊處其怪遂絕
至和中樂安公守蘇州日虎丘屋下水漏出竹
簡數十小片皆朱書有孝建年號蓋宋武時紀
年也蔣頴叔自記于手藁其孫世昌錄收之

和靖尹先生去筵經寓虎丘之西菴榜曰三畏齋嘉定初丁焞晦父通守吳郡乃建祠堂于其後
范文正公典鄉郡首建學聘安定胡先生條立學規講堂照壁猶是當時故物元統二年劉漢臣者為教官乃拆以造其女奩具未几失火獨焚其廬而文正之祠歸然無恙

樂備字功成本淮海人寓居崑山以文學名于

時登紹興二十四年進士第仕至寧器監簿

顏度字魯子充國公五十三世孫由唐魯公之

孫子仕常熟遂為吳人舉進士以文章政事名

一時仕至工部侍郎孝宗嘗謂度每出一言不

動凝如山弟愿字子循子叔修字

晏晏從子叔玠字景珪叔瑜字粹中叔剛字

皆擢高科叔升字景容叔璵字器之特奏名


其子孫皆居真慶坊

顏直之字方叔世為郡之長洲人生而端厚穎
悟異常好讀書靡不涉獵以弓矢應格差監省
倉即丐祠養親主管建昌軍仙都觀自號樂閑
居士作退靜齋婆娑其間幅巾危坐焚香撫琴
意泊如也平生好施與尤樂以藥濟人疾苦賴
以全活者甚衆備物致用率以智剏輒出人意
表工小篆得詛楚筆意嘗與叅政樓公鑰書攻
媿齋榜媿字采之齊侯鐫樓公意以為已合賦

詩美之所著有集古篆韻二十卷瘍匠方論外
科會海瘍匠本草等書公氣貌豐碩善揖生不
過声色而年止五十一以嘉定十五年五月甲
寅卒墓在吳縣至德鄉雅宜山子汝霖汝礪汝
勛汝勛字元允有清行少傳趙師貢以郊恩奏
得官主温州永嘉簿江陰軍錄參兩浙轉運司
帳管改官主管文字知和州含山縣監左藏西
庫辟淮東安撫司機宜文字通判滁常二州慶

元府俱不赴奉祠靈臺觀官至朝散大夫至元
二十八年八月四日卒年八十七

此書當與中吳紀聞合看中有互證處



吳中舊事一冊伍忠光所集小說內已
刊行但遺誤頗多不得為善本遠遜是
編也已酉長至日北苑跋

嘉慶辛未秋七月深飲鮑文以此冊歸余計志雅
堂雜抄七十七葉吳中舊事三十三葉 光曾記



Handwritten text in vertical columns on the right page, likely bleed-through from the reverse side. The characters are faint and difficult to decipher.

Handwritten text in vertical columns on the left page, partially obscured by a large watermark. The characters are faint and difficult to decipher.



